

## على مسمى ..!!

وهاتعب روحى ليه وادور على مسمى

بيوصف حالى دلوقتى وأنا وياك

وحالى ما يوصفوش كلمة

كفاية ان أنا مأمناك



على روحى ومرتاحة ومبسوطة

ومش شايلة هموم ولا حزن

وعايشة ف احلى حدوتة

وشايفة عينيك دى اجمل حزن

تاخذنى منى وتعدى حدود الصعب

ومش فارق يقولوا حب أو مش حب

كفاية ألقى روحى معاك..



بنتكلم وراحتك بتلاقيها عندى

وجودك كان سبب سعدى

ولو دمة على خدى

بكلمة حلوه تمسحها

صديقه حبيبه بتشوفها

وأنا سايبها بظروفها

وعمرى ما كنت أعرفها

مشاعر صعب أشرحها !!..



## بواقى حنين ..!!

والومه ليه .. وأيه ذنبه ..؟؟

ع الوضع اللى قلبى أنا فيه

ما عقلى قال لى ياما نبعد

وقلبى تاعبنى مش قادرة بجد عليه

مكنتش يوم ف حساباته وم الدنيا اللى براها

ومن عمرى سنين فاتوا وصعب تانى ألقاها



وليه اكمل ف حب بس من طرفى

واذل نفسى ليه بضعفى

ولو فى بواقى حنين

وبيه انا ممكن اتحجج وتبقى مشاعرى معذوره

وليه أظهر ف صورة واحدة مكسوره

ومش عارفة طريقها منين ..

هاجمد قلبی لازم ابعد وعنه اغیب

ما اهوش نافع لقلبی حبیب

ده عمره ما حاسنی وعاشنی

واعیش ازای ولیه اکمل ف قصه باشوفها مش کامله

بیبعد کل ما بأقرب وبخسر جمبه میت جولہ

ده خیب فیها یاما ظنی !!..

